

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839




FAAVAEINA 1839

O LE SULU SAMOA ME 2025

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws



LAULAU FONOTELE 2025-2026



Laulau Filifilia 2025-2026



Laulau talu ai 2024-2025

O LE FAASINO UPU

- i. OLE LAUGA....2
 - ii. TALA FAASOLOPITO 150 FONOTELE...4
 - iii. TALAAGAAU PENISIONE 2025.....8
 - iv. LAUGA FONOTELE.....11
 - v. AU FAAU'U FAIFEAU SAMOA....13
 - vi. GASOLOGA FONOTELE 2025....14
 - vii. OLE PEROFETA MULIMULI...15
 - viii. ATA ONISI MATAUPU LOMIA....16
-

O LE LAUGA

Tusi Faitau Luka 9 : 1 – 27.

Matua Luka 9 :22.

“E tatau ona tiga le Atalii o le tagata i mea e tele, ma ia lafoa’iina e toaina ma ositaulaga sili ma le au tusiupu, ia fasiotia foi, e fa’atuina foi o Ia i le aso tolu.”

AUTU : A’OA’OINA I LE GALUEGA. (On the job training.)

O le la’asaga muamua lava lea e ao ona fa’afeagai ma soo se tagata faigaluega: ia a’oa’oina i le galuega. O ā galuega? Se mau galuega. Leoleo, foma’i, loia, faiaoga, su’etusi, faifeau, kamuta, inisinia, tausi aiga, mf. Aisea e taua ai ona a’oa’oina muamua i tatou i ia galuega? Ina ia ia te i tatou le atamai, agavaa ma le iloa e faatino ai le galuega. Ia iloa tonu e le tagata lana matafaioi e galue ai i le galuega. E le faapea a foma’i ona foma’i faasoloatoa ai lea. Leai; e ese le foma’i mata, ese le foma’i tipitipi, ese le foma’i nifo, ese le foma’i mo tamaiti. E faapeaina foi isi ituaiga auaunaga uma, ua mae’a lava ona tu’umavaevae vaega taitasi.

O le tāua ia o le silafia lelei e le tagata o lana matafaioi i totonu o le galuega. Tāua le malamalamaina e le tagata o le siosiomaga o lana galuega o le a galue ai. E le fesootai uma siosiomaga o ituaiga galuega eseese. O le a tonu le uiga o le upu siosiomaga i le galuega? O le silafia, lagona, gagana, meafaigaluega, laei, saogalemu, fa’agasologa o le galuega. O le mea lava lea e taua tele ai i soo se avanoa e fa’asalalauina ona faailoa tusipasi ma talaaga o soo se tagata e talosaga, ina ia mautinoa lelei e lea pulega ua mae’a ona a’oa’oina lea tagata ma ua talafeagai lelei mo ia lea avanoa.

O le upu moni e le tagatasi uma galuega sa galulue ai le au-soo o Keriso a o le’i valaauina i latou e Iesu e fai mona so’o. ‘Aufaifaiva, ao lafoga, faifaatoaga, tausi aiga...ma isi, a e na valaau loa Keriso e mulimuli atu ia te Ia, na te faia i latou ma faifaiva i tagata. Fa’alologo ma usiusitai loa ua lafoai galuega ua leva ona galulue ma auauna ai, a e mulimuli ia Iesu.

Galuega ia sa galulue muamua ai le auso’o a o le’i valaauina e Iesu, e leai lava se eseese ma galuega o loo galulue ai le to’atele o tatou. Galuega faaletino..mo le a le fa’amoemoe? Tausiaina o aiga, faatinoga o auaunaga i totonu o Ekalesia ma soo se sosaiete aemaise o atina’e masani i aso uma.

E ese mamao galuega ia ma le galuega aemaise o le faamoemoe lea ua valaauina ai e Iesu ona soo e toasefululua. Galuega e faaleagaga, galuega e fai i loto o tagata, galuega e fai i le lotomaulalo, lototele, onosa’i ma le fa’atuatua, lea sa matua galue ai Keriso e a’oa’oina ai ona ausoo. Le galuega e le fa’aaogaina i ai se malosi ma ni auupega faafitafita a o se atamai po o se poto faalelalogagi. **Galuega a Iesu e faamoemoe foi ma faalagolago ia Iesu.** O a la auupega a Iesu? O lana upu e a’oa’o atu ina ia goto uga ifo i loto ma lagonaina e tagata le salamō mai le olaga tuai o lo o soifua ma ola ai.

Auala atu i ana vavega e fai, lauga, faamalologa, tala faa-faataoto, aemaise le olaga ia faapaiaina, mulimuli lava tautala atu a e o faatinoga ia atagia ai amio fa’a Iesu. O le Galuega a Keriso o le galuega alofa, galuega lavea’i, galuega faaola, galuega e faia i le faatuatua. O le amataga lava o le Mataupu lenei e 9 (Luka 9:1-2), o loo matua manino mai ai le tala a Luka. **Ua faapotopotoina e ia ona soo e toasefululua. Ua tuu atu ia te i latou le mana ma le pule i temoni uma ma ia faamalolo i ma’i. Ua auina atu e talai le Malo o le Atua.** E le’i faapea na aveia loa ma soo okomeki lava ona tuuina atu e Iesu ona soo e o e fai le galuega, e leai; e tele taimi sa mafuta, vaavaai ma fa’alologo a e a’oa’o Iesu ma faatino galuega alofa, galuega lavea’i ma galuega fa’aola.

Ai lava ua silafia e Keriso ua lava tapena ma a’oa’oina i latou i le galuega ona tuuina atu lea o i latou e o. A outou silasila ma tatou maitau lelei i le misiona a Keriso, peiseai e leai lava se eseese ma le faagasologa o loo i ai a’oa’oga i nei ona po. Galuega Faamasani e tatala atu ai vasega matutua pe a ma le lua i le tolu vaiaso e o e faamasani ma vaavaai i faatinoga o galuega i tua. E tai faapena foi se silasila mamao a Keriso, o lea ua tu lalata i le taimi e alu ese ai a e tuua na o lona ausoo. Ua auina atu i latou se’i faamasani ma vaavaai, ua na o i latou e feagai ma tagata lautele i amioga eseese ma le lalolagi matafelefele, leaga o iina tonu o loo taatia ai lana galuega. **Ia lea ua o, ua faamanuia atu i ai Iesu**

ma tu'u atu ia te i latou le pule ma lona mana e fai ai le Galuega. Tala fialia lo latou fo'i mai ma le olioli i le manuia o le galuega. Tutuli temoni, faamalolo ma'i, tala'i le Malo o le Atua. Mitamita ma le agaga faagaetia ua latou mafaia ona faia. Peitai o le vaivaiga lea ua iloa e Keriso, e le o matua goto ifo i loto ma agaga o le ausoo le uiga moni o le galuega ua a'oa'oina ai i latou. O le tau gaga ifo o le la a e ua o mai le ausoo ia Iesu ua tataua ona tatala atu le motu o tagata ina ia o'i faoa aai, leaga ua alu le aso e le'i aai i latou moomia ona maua e tagata se faasiliga malosi. Peitai ua fetalai atu Iesu i ona soo; **"Ia outou avane ni mea e 'ai ma latou"**. Ae faauta i la latou tali sa tali ane ai ia Iesu. **"E leai ni a tatou mea, na o areto e lima gafua, ma i'a e lua lau; seiloga matou te o e faatau ni mea e 'ai ma nei tagata uma, aua o i latou uma pe toailima gaafe o tane. O le fesili: a o fea ea le mana ma le pule sa tuuina atu e Iesu ia te i latou e fai ai le galuega?"** O le upu moni e matua leiloa lava e tagata po o ai Iesu ina ua fesili atu Iesu i lona ausoo, pe se a ea le upu a tagata ia te ia po o ai? O le tali a le lalolagi i lo latou silafiaina o Iesu; **e faapei lava Iesu o Ioane le papatiso, o isi o Elia, a o isi o so le au perofeta anamua.** Ioe!, ua tataua i tagata ona latou le iloa tonu Keriso auā e le'i a'oa'oina ai i latou e faapei o le au so'o sa fesili foi i ai Iesu; **"a o outou na, se a la outou upu ia te a'u nei po o ai?"** Ona tali mai lea o Peteru, **"O oe o le Keriso o le Atua"**. Matagofie le tali, selau pasene le iloaia e le ausoo o Keriso; a e maimau e, pe ana o faatasi galuega ua faia ma le iloaia o Iesu ua latou tali mai i ai ma le faatuatua, lea e finagalo Keriso e fafaga ai lana lafu mamoe. Ioe o le taua o le a'oa'oina i le galuega a Keriso, o le nofo 'amu i aai o finagalo le aano moni ua valaauina ai, ma goto uga ifo i le loto le alofa faamaoni i le galuega ua fai mona aiga.

E peisea'i o le isi lea uiga o le saunoaga a Keriso faapei ona fai ma matua; **"E tataua ona tiga le Atalii o le tagata i mea e tele, ma ia lafoaiina e toeaina ma ositaulaga sili ma le au tusiupu, ia fasiotia foi; e faatuina foi o ia i le aso tolu"**. O le faamautuina o le aoaoina o i tatou i le Galuega. E tataua ona tatou lagonaina le tiga alofa i Galuega ua valaauina i tatou e galulue ma auauna ai. O lagona tiga o le Atalii o le tagata i le galuega ona e pele ia te Ia Lē e ona le Galuega. E tiga alofa ona e leai se isi lava auala e lavea'iina ai tatou, e na o lona maluu lava. E tiga alofa ona ua silasila atu o Ia, Talofa! Ua sina le saito a e toaititi le aufaigaluega. E manino le tiga alofa o le Atalii o le tagata ona o lona faamaoni sa ofoina atoatoa ai lona soifua e faatino ai lana auaunaga. O le loloto lea o le aoaoina e tataua ona goto uga ifo ia te i tatou e galulue ai mo le Atua o le tiga alofa. Alofa i lou tuaoi, alofa i lou uso, alofa ia te

oe lava, alofa foi i le Atua e ana meaalofo ua avagalima ai a tatou auaunaga.

Lafoa'iina e toeaina ma ositaulaga sili ma le au tusiupu. So'o se tagata faamaoni lava i se galuega, e inosia, fa'asinosinomia, lotoleagaina, tauemua ma itagia. O le maulalo lena sa tuumaulaloina ai Keriso e Iutaia. Ua fesiligia lona siosiomaga. O le atalii o Iosefa le kamuta. E tupu ea se mea lelei mai Nasareta o se aai ititi ma le faatauvaa? Ua a'oa'o mai Keriso i le auala tatou te a'oa'oina ai lana galuega. **"O le tali filemu e liliueseina ai le ita. Po mai le tasi alafau, liliu i ai le isi alafau."**

Fasiotia. O la Keriso, ai se fia mulimuli ia te ia, ia amo lona satauro. O le fasiotia o i tatou i le galuega a Keriso, o lo tatou siilima lea i o tatou lava manaoga faa le tagata, faa le lalolagi a e loto atu i le faasinoga a le Agaga Paia. O lona uiga ua pule le Atua ia i tatou ina ua le faia lava so tatou loto a e fai lona finagalo. E atagia lea i lo tatou faia lea o galuega uma i le amiotonu, fa'amaoni ma le ma'elega e tusa ma le finagalo o le Atua.

E fa'atuina o ia i le aso tolu. E leai lava se galuega e aunoa ma sona tau. O lo tatou tiga alofa i le galuega o lo tatou lagonaina moni lena o lo tatou valaauina. Tatou te mumusu e ta'uaveina Lē e ona le feau, tatou te mumusu e upuia i tatou ona ua fa'amaonia ua tatou le fa'amaoni, tatou te mumusu tatou te pule i le taimi e atagia ai lo tatou faifaiaga, paiē ma le lē manatu mamafa i le galuega. O le a'oa'oina moni lea i le Galuega, e iloa i aso louloua ma taimi o faigata e fesouaina ma le mautonu ai ina ua osofaia e le fili ma le tiapolo. Peitai e tumau pea le faamoemoe, e mau'a'a pea le faatuatua ma taofi i'u maea, e i ai lava le aso e tauia ai i tatou e Keriso. O la Keriso i le auauna manumalo; le auauna lelei e ma le faamaoni, ulufale mai ia i le fialia o lou Alii.

Ioē ! O le taua ia o le a'oa'oina i le galuega, aua o iina tatou te maua mai ai le tomai, agavaa aemaise o metotia e faatino ai galuega, peitai e silisili ai ona faatamaoagaina i tatou pe afai tatou te faamoemoe ma faalagolago i le faiaoga sili o le Agaga Paia lea o le Atua. Toatele nisi ua tuumaulaloina ona o lo latou faia o le galuega e aunoa ma se silafia a'oa'oina, peisea'i ua latou fa'amamafaina lava le valaauina e Iesu o ona soo e toasefululua o ni tagata faatauvaa ma le lē taualoa, ai ua galo i le lalolagi o le Iunivesite silisili lava lea sa a'oa'oina ai le ausoo o Keriso, aua o ia o le mataisau o le Faiaoga o faiaoga. Le maua luga o ana a'oa'oga sa avea ai lava lona soifua e fai ma faaitaiga sili o le soifua auauna i ona soo ma le lalolagi uma e ala i lona maluu, a e na toetu mai le oti ma le tuugamau. Amene.

Saunia : Enoka Pouniu (FS)
EFKS Petania Fou. (Toamua – uta).
Matagaluega FALEATA

OTOOTOGA O LE TALA FAASOLOPITO O LE 150

TAUSAGA (1875 – 2025) O LE FONOTELE A LE EKALLESIA

FAAPOTOPOTOGA KERISIANO SAMOA (EFKS)

(Tusia e Professor Dr. Vaitusi Nofaiga FS, Kolisi Faafaifeau Malua.)

Aotelega

O le faamoemoe o leni tusiga, o le faamatalaina lea o se tala otooto o le tala faasolopito o le Fono Tele a le Ekalesia Faapotopotoga Kerisiano Samoa (EFKS). E tele ni vaega tāua o leni tala faasolopito o le a le mafai ona faamatalaina uma ona o le avanoa faatulagaina mo tusiga i le tusitusiga tuufaasolo leni a le Kolisi Faafaifeau i Malua. Peitai, o le a avea le tala otooto leni o le tala faasolopito o le 150 tausaga o le EFKS e faamaite ai nisi su'esu'ega o leni tala faasolopito taua tele. Na iloa i su'esu'ega mo le tuufaatasiga o leni tusiga le taua tele o le sao o le Fono Tele, e le gata i le galuega a le Ekalesia Faapotopotoga Kerisiano Samoa, i Samoa nei ma atunuu i fafo, a e faapea foi le galuega faamisionare a le Ekalesia i le Pasefika, ma le lalolagi. O le a ta'ua i leni tusiga le ulua'i Fono Tele na usuia i Malua, ma nisi o mafuaaga na a'e ai le tofa i alii misionare ina ia faia le Fono Tele lea. O le a ta'ua ai foi suafa o nisi o Tamā, Faifeau, ma Tiakono Samoa, sa avea ma Taitaifono o le Fono Tele, i totonu o le 150 tausaga o le Fono Tele. O le Fono Tele a le EFKS o le faatumutumuga lea o le faataotoga o le Ekalesia, e soalaupuleina mataupu uma mo le atina'eina o le Galuega a le Atua le Pule Aoa o mea uma, o Lē e ona le Ekalesia.

Upu Ta'iala: Atua, Fono Tele, Ekalesia Faapotopotoga Kerisiano Samoa (EFKS), London Missionary Society (LMS), misionare, Faifeau Samoa (FS), Laulau-a-fono.

Faatomuaga

I le tusiaina ma le tuufaatasia o se tala faasolopito, e le gata e i ai ona itu lelei, a e faapea foi ona itu e lē atoatoa ai. E lē fesiligia le tāua tele o le tala faasolopito o le Fono Tele o le Ekalesia Faapotopotoga Kerisiano Samoa, ona o le Fono Tele, o le faatumutumuga lea, o le faataotoga o le Ekalesia. E i ai lona Laulau-a-fono, o sui usufono, o Komiti eseese o le Ekalesia, ma usufono filifilia mai Aulotu,

o Pulega ma Matagaluega, i Samoa ma atunuu i fafo o le Ekalesia. O mataupu uma tau le Ekalesia ma lona lumanai, o le Fono Tele lava, e faia faai'uga mulimuli. O le nafatausi lea o le Fono Tele e taua tele, ma ua tatau ai, ona faamatala sona tala faasolopito, auā le faamanatuina o lona 150 tausaga.

Nisi o Mafuaaga na a'e ai se Tofa e Usuia le Ulua'i Fono Tele

E leai lava se faiva e 'asa ma se maumau. O se vaaiga lea i le faasologa mai, o le galuega so'oso'o tau'au a alii misionare ma tagata Samoa, mai lava i le amataga i le taunuu mai o le Talalelei i Samoa. E le'i faigofie le amataga o le galuega faamisionare i Samoa. O le manatu masani lava o alii misionare papalagi, e pei ona i ai i isi foi galuega faamisionare i nisi vaega o le lalolagi i le vaitau o le 1800 agai atu i le 1900, fai mai e le'i sauni tagatanuu, o nuu ma atunuu ua oo i ai le Talalelei, e avea ai i latou ma faiaoga ma faifeau faauuina, e taitaiina galuega faamisionare. O se tasi lea o mafuaaga na va ai le fogavaa i le galuega faamisionare i Samoa, i le va o alii misionare ma tagata lotu Samoa. E le'i taliaina e tagata Samoa lea lagona, aemaise ina ua faavae le Kolisi Faafaifeau i Malua i le 1844, ma ua toatele a'oa'o ua i'u mai Malua, ua i ai le tomai e mafai ai ona latou faatinoina le galuega faamisionare. Peitai, e manatu alii misionare papalagi, e le'i sauni tagata Samoa mo le laasaga lea, ona e leai se isi e agavaa. Na tupu tele le feteenaiga lea i le va o tagata lotu Samoa ma le Komiti Au Faatonu (Samoan District Committee), ona o sui auai, o alii misionare mai Europa. Na iloa atili lea feeseeseaiga ona o lipoti e aumai e alii misionare papalagi, i fono a le Komiti Au Faatonu, e faailoa mai ai lo latou le fiafia i a'oa'o Samoa, sa latou galulue faatasi i isi nuu ma motu o le Pasefika. O le latou mau, e le lelei le faatinoga e alii Samoa o le galuega a le Atua, i nuu ma motu o latou galulue faatasi ai, ona o le lē faalogo i a latou faatonuga i faatinoga e tatau ona fai, e lelei ai le galuega.

Peitai, o le molimau a tagata Samoa ia, e le tatau ona latou faia ni faatonuga mai alii misionare papalagi, i lo latou talitonuga e afaina ai le galuega i nuu ma motu na galulue ai. O se faaitaiga, o nisi o faiga o

loo faatonu ai i latou e alii misionare e faatino ai le galuega, e taotaomia ai nisi o tu ma aganuu lelei o loo ola ai tagatanuu o nofoaga o loo latou talaiina ai le Talalelei. O le latou mau, e leai lava se eseese ma nisi o tatou tu ma aga i o tatou nuu i Samoa. Na molimauina e alii misionare papalagi, le tutu faatasi o a'oa'o ma faiaoga Samoa, e teteu uiga ma le vaai lea a misionare papalagi, i lo latou faatinoina o le galuega. O le tasi lea o mafuaaga, na amata talanoaina ai loa le tataua ona fai se **Fono Tele**. E avea o se avanoa e o mai faatasi ai le aufaigaluega misionare papalagi, ma a'oa'o ma faiaoga Samoa, o a'oa'o ua i'u mai Malua, e talanoa faatasi ni auala e faaleleia atili ai le faaauuina o le faailoa ma le tala'iina atu o le Talalelei e le gata i Samoa, a e faapea foi i le Pasefika ma le lalolagi. A o se auala foi e maua ai se malamalamaaga lelei, i nisi o mataupu e le o manino ai itu e lua. O fonotaga a le Komiti Au Faatonu (Samoa District Committee) i tausaga 1873 – 1874, na faia ai loa ma le latou faaiuga, ua tataua loa ona usuia se **Fono Tele** (Annual General Assembly), e faaleo ai finagalo o a'oa'o Samoa i le galuega i Samoa, ma atunuu i fafo. O le faamoemoe o lea finagalo o le Komiti Au Faatonu, ina ia maua se fesootaiga lelei o itu e lua mo le lelei o le galuega a le Atua, i Samoa ma le Pasefika. O le vaitau na toatele ai a'oa'o ma faiaoga mai Malua, ua auina atu e tala'i le Talalelei i le Pasefika, i motu e pei o Tuvalu ma Kiribati.

Fono Tele Muamua ma nisi o Mataupu Tauga na Talanoa ai

Na faataunuuina le iugafono a le Komiti Au Faatonu e pei ona ta'ua i luga, i le usuia o le uluai Fono Tele i le tausaga 1875 i Malua. O usufono na auai i le Fono Tele lea, e na o misionare papalagi, o a'oa'o ma faiaoga Samoa na iu mai Malua. O le taimi o le toatele o a'oa'o ma faiaoga i'u mai i Malua, talu ona faavae Malua i le 1844, a e leai se isi ua faauuina e avea ma Faifeau Samoa (FS). O le tasi lea o mataupu taua tele, na talanoaina i le ulua'i Fono Tele lea. Ia faauuina a'oa'o ma faiaoga uma e i'u mai i Malua e avea ma Faifeau Faauuina (Ordained Minister) po o Faifeau Samoa (FS) e ta'ita'iina sauniga o Sakarameta. O le susuga ia Vaelua Petaia, o le a'oa'o i'u mai Malua, o le Samoa lea na ta'ita'ia le finauga o le mataupu i le faauuina o a'oa'o ma faiaoga i'u mai Malua i le Fono Tele muamua. O le mafuaaga lea na tuai ai ona faau'u a'oa'o ma faiaoga

Samoa ua i'u mai i Malua, ona e manatu misionare papalagi, e leai se a'oa'o po o se faiaoga ua agavaa mo le galuega faafaifeau. O se lagona ma se mafauauga lea o alii misionare, e pei ona ta'ua, sa tele ni finauga ma ni feteenaiga na tutupu mai ai i le va o alii misionare ma tagata Samoa i ia vaitau. Peitai, e i ai lava le taimi o le Atua, i soo se mea, ina ia maua le nofo lelei, aemaise le aga'i i luma o le Galuega Tala'i. Na faia ai lava i le uluai Fono Tele lea i le tausaga 1875, le faaiuga, o le faia loa o se faauuga o a'oa'o ma faiaoga uma ua i'u mai Malua, na i ai i le taimi lea, e avea ma Faifeau Samoa faauuina. E pei ona ta'ua e Crawford i lana tusitusiga, e le'i faigofie le taliaina o le avea o a'oa'o i'u mai Malua e faauuina e fai ma faifeau ona o le manumanu lava o alii misionare ia mautinoa ua sauni ma tapena lelei a'oa'o i'u mai Malua mo le faamoemoe lea. E ui i ni mafuaaga sa tau taofiofi ai le taliaina o le faauuina o a'oa'o i'u mai Malua, a e sa faataunuuina lava lea faamoemoe e tusa ai ma le iuga o le Fono Tele muamua, e pei ona ta'ua. Fai mai se tasi o molimau, o le faauuga muamua foi lea o Faifeau Faauuina i le Pasefika, na avea ai Faifeau Samoa Faauuina ma Faifeau amanaia i le Pasefika.

Faauuga Muamua o Faifeau Samoa, o se tasi o l'uga Tāua o le Fono Tele Muamua

Na talia le finauga ma faia ai loa le uluai faauuga o a'oa'o i'u mai Malua. E pei ona taua i luga, o le a'oa'o i'u mai Malua, o Vaelua Petaia, na taitaia le finauina o le faauuina o Faifeau Samoa. O lona atalii e suafa foi ia Petaia, o le uluai Samoa lea na avea ma faiaoga i Malua. O le isi ona atalii e suafa ia Faletose o se tasi o faifeau iloga na tula'i mai i ona vaitaimi i le Galuega a le Atua, aemaise lava le feagai ai ma alii misionare, i le finauina lava o le tāua o tagata Samoa i le Galuega. E toatele nisi o faifeau na tupuga mai i nei Tama o le Ekalesia.

E 30 le aofai o a'oa'o ma faiaoga i'u mai Malua na faauuina ai. O se mitamitaga tele lea, o tagata Samoa o le Ekalesia i lea vaitau, ona o se avanoa foi ua mautinoa ai le amataina loa o le avea ma Faifeau Samoa ma ta'ita'i o aulotu. O le tula'i mai o lenei laasaga taua tele, i le agai i luma o le Ekalesia, na avea ma faatupu fiafia ma le olioli i tagata lotu Samoa, ma ua vaaia ai le galulue fiafia o tagata lotu o le Ekalesia. A o le isi itu taua tele o lenei faaiuga ma lona faatinoga, o le faia o se Fono Tele, na iloa ma vaaia ai le galulue faatasi o misionare papalagi ma

a'oa'o ma faia'oga ua i'u mai Malua, ua faauuina e fai ma faifeau, aemaise o tagata lotu Samoa.

E le umi ona mālō le fili ma le tiapolo e taumafai e lepeti se faamoemoe lelei o se faapotopotoga o tagata faatuatua, i le Galuega a le Ekalesia mo le Atua. E le tatau ai ona faitio i le galuega taumafai a nai alii misionare papalagi, e pei ona iloa i nisi o tusitusiga. O le mea moni, o le silasila a alii misionare i lo latou taumafai ai e atia'e le Galuega o le Talalelei i Samoa, o le latou lava lea vaai, mai i o latou lava manatu faa tagata Europa, i itu e lelei ai le Galuega a le Atua. Na iloa le naunau o nai alii misionare ia mautu ma lelei le Galuega a le Atua i Samoa, ina ua oo i le taimi ua latou tuua ai le Ekalesia i Samoa i tagata Samoa, i le tausaga 1962, a e toe foi i Peretania ma Europa, na o lava ma le fiasia. Na aumai le latou faamanuia, ma le latou talitonuga, ua tapena ma saunia lelei tagata Samoa, i le taimi lea ma ua tatau ai, mo le fa'aauuina o le Galuega a le Ekalesia i Samoa.

Na filifili ai i le Fono Tele i le tausaga 1962, le suia o le igoa o le Ekalesia mai le Ekalesia Samoa LMS, i le Ekalesia Faapotopotoga Kerisiano Samoa. E le'i faigata lenei suiga, ona o le taua o le sao o le Fono Tele, e i ai uma sui usufono mai Aulotu, Pulega, ma Matagaluega o le Ekalesia Aoao, i le galueaina o le aga'i i luma o le Ekalesia. O le talitonuga faa-faapotopotoga i le faatinoga o le galuega a le Ekalesia mo le Atua, e pulea ma vaaia e le faapotopotoga o tagata. O le ioega ma finagalo autasi no le faapotopotoga o tagata o le Ekalesia i le Fono Tele, ua fai ma sui o le Ekalesia Aoao i soo se mataupu mo le manuia o le Ekalesia, o le faaiuga lena e faatino ma fai. E le fuaina i se vaai ma se pulega a se tagata e toatasi. O loo molimauina i nei aso, i Fono Tele a le Ekalesia i tausaga taitasi, le tuua o le faiga lea faa-faapotopotoga.

O Usufono o le Fono Tele

O le tulaga o usufono na auai i le ulua'i Fono Tele, e na o misionare ma a'oa'o i'u mai Malua na fai ma usufono. O le taimi lea e pei ona ta'ua, e le'i i ai se a'oa'o i'u mai Malua ua faau'uina e fai ma Faifeau Samoa (FS). Na faatulaga ai ma usufono, e toa iva mai Upolu, to'a ono mai Savaii, toa lua mai Tutuila, ma le toa tasi mai Manu'a. E le'i auai ni sui o tagata lotu e pei o tiakono ma a'oa'o fesoasoani i uluai Fono Tele. Na lagonaina e misionare ma faifeau, e le o atoa le talanoaina o mataupu i le Fono Tele ona

e lē o i ai se leo o tagata lotu. Na faia ai loa le faaiuga i le Fono Tele i le tausaga 1893, e tatau ona auai sui usufono e filifili mai i tagata lotu, e pei o a'oa'o fesoasoani ma tiakono. Na vaaia le taua o lea foi faaopoopoga o usufono aua le faatinoga o le nafatausi o le Fono Tele, a o le avanoa e faaleo ai se finagalo ma ni lagona o tagata lotu e ese mai i faifeau ma misionare.

Nisi o Vaaiga Tāua i le Ekalesia ina ua mae'a le Fono Tele Muamua

O le isi itu taua na vaaia e alii misionare ina ua mae'a le Fono Tele muamua ma le faau'uga muamua o faifeau, o le faaopoopoina o le numera o tagata lolotu. Ua toatele tagata Samoa ua liliu ma avea ma tagata lotu o le LMS. E toatele faifeau talavou, na faau'uina i uluai Fono Tele, ma ua molimauina ai e misionare, le toatele o tupulaga ua fiasia e o i le lotu ma auai i galuega fai mo le atina'eina o le Ekalesia. O lona uiga, e le gata e taua le avea o tagata Samoa ma Faifeau po o Taitai o aulotu i nuu, a e faapea foi le avea ai o i latou ma ala, na fiasia ai le toatele o tagata e auai i le Lotu.

Sa vaaia ai foi le pei o se tu ma se aga, le fa'aauau e fanau a faifeau na mua i malae i le galuega, le aga'i e a'o'oga i Malua, mo le fa'aauuina o le galuega faaifeau, na fitaituga ai nai o latou matua. E pei ona molimau misionare, o le tele o nuu ma aulotu, e pei sa ave le latou faamuamua i le filifilia o fanau a faifeau na i ai muamua i le Galuega, mo latou nuu. O le faailoga lea o le lelei ona faatino o galuega a nai tua'ā na muamua i le galuega. I le vaai la a nuu, o le a faapea foi ona soso'o e nai a latou fanau o loo faasolo mai, le faatinoina lelei o le galuega e pei ona sa faia e o latou tua'ā.

O le tāua foi o le uluai fono lea, na amata ai foi ma le fono a Mafutaga a Tina. O faletua o faifeau na faau'uina e fai ma Faifeau Samoa i le uluai Fono Tele, o sui muamua ia o le Fono muamua a le Mafutaga Tina. O lona uiga, ua 150 foi tausaga o le Fono a Mafutaga a Tina, ma ua fetaui lelei lava ma le latou maota na fausia i lenei tausaga 2025, o loo faatuina i Papauta. E mafai ona avea le latou galuega tele lea i Papauta, o se maa faamanatu o le 150 tausaga o le Mafutaga a Tina.

O le Saofaiga a le Fono Tele a le Ekalesia ma lona Tāua

I le tala faasolopito o le Ekalesia, e silisili ese lava le Atua, le Pule Aoao o mea uma, o Lē ona le Ekalesia. O le saofaiga a le Fono Tele, ma lo latou soalaupuleina o mataupu mo le Ekalesia, e tataua lava ona faamoemoe i le Agaga Paia o le Atua Pule Aoao, e mautinoa ai le manuia o fuafuaga uma ma o latou faatinoga. Le saofaiga e ta'ita'i e le Laulau o le Fono Tele ma Ta'ita'i o le Ekalesia, o sui vaaia o le Atua, i le talitonuga faapotopotoga. O se tapenaga mamao na tapuaaoina e le Atua, auā le Ekalesia. E tāua tele ai le Fono Tele ma lona Laulau-a-fono.

E le fesiligia le tele o galuega lelei mo le Ekalesia na faai'ugafonoina e le faasologa mai o Fono Tele a le Ekalesia. O loo iloga ia galuega lelei ma o loo faamauina foi i lona tala faasolopito. O se tasi o ia galuega lelei o loo iloa i le fesootaiga o le Fono Tele ma le Malo o Samoa. Faataitaiga, e i ai Ta'ita'i o le Malo Samoa, e pei o i latou na fai ma Palemia o le Malo o Samoa, na oo i le tofi Taitaifono o le Ekalesia, e pei o le Afioga Fiamē Mataafa Mulinuū, ma le Susuga Tofilau Eti Alesana. O le isi faataitaiga, o le sao taua o le Ekalesia e ala i lana Fono Tele mo le taumafaiga o le amataga o le Malo Tutoatasi o Samoa, o le taliaina o le tatalo mai a le Malo Samoa i le Fono Tele i le Gagaga Peretania. Na talia e le Fono Tele, ma auina ai faifeau e toalua o Etenē Saaga ma Aorae Petaia. O alii faifeau nei, e tupuga mai foi i aiga o faifeau sa mua i malae i le galuega. E pei o Etenē Saaga, e tupuga mai le Toeaina o Etenē Saaga muamua (1868-1950), mai le nuu o Fagamalo i Savaii, o se tasi o uluai Samoa na a'oa'oina i Peretania. Sa ave faapitoa e misionare ma le Ekalesia e a'oga i Peretania i le tausaga e 1891, auā le Kolisi Faafaifeau i Malua ma le Ekalesia i Samoa. Na foi mai ma avea ai ma ulua'i Samoa na tofia e fai ma Pule o le Kolisi Faafaifeau i Malua. E 47 tausaga na avea ai Etenē Saaga ma faiaoga i Malua.

O le Fono Tele na talanoaina ma talia ai le Faavae o le Ekalesia Faapotopotoga Kerisiano Samoa (The Constitution of the Congregational Christian Church Samoa), e pei ona i ai nei, e mulimuli ai faatinoga o feau ma galuega a le Ekalesia, faapea foi ana iugafono tumau, ma finagalo o Komiti eseese o le Ekalesia, i ni atina'e e lelei mo le agai i luma o le Ekalesia. I le tala faasolopito o le Fono Tele, e sefululima teuteuga o le Faavae o le Ekalesia ua aumai i luma o le Fono Tele, talu mai le faataotoga muamua o le Faavae o le

Ekalesia, e pei ona taliaina ai e le Fono Tele i le tausaga 1928. O le teuteuga mulimuli na talanoaina ma taliaina i le Fono Tele o le tausaga 2022. O faasinoga po o aiaiga sa ta'ita'i ai galuega a le Ekalesia a o le'i tuufaatasia le faavae lea, sa mulimulita'i lava i aiaiga ma iugafono tumau sa faia e le Komiti Au Faatonu (Samoa District Committee), e pei ona ta'ua, o ona sui auai o alii misionare papalagi. Sa lelei mea uma i le taitaiga a nai alii misionare. O i latou foi na faamaiteina ma taliaina i le Fono Tele i le tausaga 1926, le tataua loa ona faia se faavae e atagia ai le faataua o manaoga o le Galuega Tala'i i Samoa. O le lona fa o le toe teuteuga o le faavae lea i le Fono Tele ia Me 1962, na faamaonia ai le suia o le igoa o le Ekalesia, mai le EKALESIA SAMOA (LMS), i le EKALESIA FAAPOTOPOTOGA KERISIANO I SAMOA. Sa faia lea suiga ina ua malilie faatasi i ai sui o le Au Matutua (Elders Committee) i Lonetona, ma sui o le Ekalesia i Samoa nei.

O le saofaiga o le Fono Tele, ua manino lelei lona faataotoga. O le Atua, o le Pule Aoao o mea uma. o le Ta'ita'i Sili, e ou le Mana uma lava, e faalagolago tasi i ai le soifua taumafai o Lana Ekalesia, ina ia faatino mea uma mo Lana Ekalesia, e tusa ai ma lona lava finagalo. Ua avea ai le Fono Tele, i le faamoemoe o le Ekalesia Samoa (LMS) mai le tausaga 1875, seia oo ina avea ma Ekalesia Faapotopotoga Kerisiano Samoa i le tausaga 1962, e tau mai i le tausaga nei, e fai ma Fono faapitoa e soalaupuleina mea uma, mo le manuia ma le lelei o le galuega a le Ekalesia, mo nei ma le lumana'i. Ua faataoto ai e le Ekalesia se saofaiga e tataua ai ma lelei mo le faatautaiga o lea faamoemoe, ina ia mautinoa le maua tonu o manatu ma finagalo uma o le Ekalesia Aoao, e faamoemoe lava i le Agaga Paia o le Atua, e maua ai se tasi, e fai ma faaiuga talafeagai e lelei mo le faamoemoe o le Atua mo lana Ekalesia. O lea saofaiga, e i ai le Laulau o le Fono Tele, e aofia ai le Taitaifono, Sui Taitaifono, Failautusi ma le Teutupe. E aofia ai le nofo-a-Komiti ua ta'ua i lalo, ma sui usufono mai Aulotu:

O le Komiti o le Au Toeaina, e i ai totonu le Komiti Faatonu o Mataupu Tau le Aufaigaluega, le Komiti o le Kolisi Faafaifeau Malua, Komiti o A'oa'oga Kerisiano. O le Komiti Faamisionare e i ai totonu le Komiti Laititi a le Komiti Faamisionare. O le Komiti Feau Eseese e i ai totonu le Komiti Faafuase'i a le Komiti Feau Eseese, ma le Komiti o Galuega...

(fa'aauau Sulu Samoa Iuni 2025)

TALA'AGA SOIFUAGA FAIFEAU PENISIONE 2025

1) Suafa: MAKERUSA POROTESANO FT**Aso Fanau:** 7 Aperila 1955**Nuu:** Fitiuta Manu'a, Sasina Savaii.**Faletua:** Faatea Masina Porotesano**Nuu:** Luatuanuu, Moataa**Aso Faaipoipo ai:** 6 Tesema 1980**Soifua Galue:** Faifeau Faleaseela Lefaga, Faifeau Aulotu Faamisionare Fiti, Faifeau EFKS Ola mo Keriso, San Diego Amerika.**Tofi i le Ekalesia:** Faifeau Tausinuu, Failautusi Matagaluega Amerika, Faifeau Toeaina Pulega Saute, Toeaina Faatonu Matagaluega Amerika.**Aulotu:** EFKS Ola mo Keriso**Pulega:** Pulega Saute**Matagaluega: AMERIKA****2) Suafa: PAUL GRAY FT****Aso Fanau:** 20 Tesema 1954**Nuu:** Saleufi, Vaimoso, Nofoalii, Vaivase-uta**Faletua:** Taulogomai Tu'u'au Gray**Nuu:** Vailoa Palauli, Gautavai, Saleaula, Falealupo, Fasitoota**Aso Faaipoipo:** 30 Tesema 1976**Soifua Galue i le Ekalesia:** Galue Komiti Tupe, Galue Komiti Faamisionare, Galue Komiti Au Toeaina**Tofi i le Ekalesia:** Faifeau Toeaina**Aulotu:** EFKS Glenroy**Pulega:** Melepone Tutotonu**Matagaluega: VITORIA****3) Suafa: MATEILILI LEAANA MAIFALA****Aso Fanau:** 17 Novema 1956**Nuu:** Saanapu, Sapunaoa, Fasitoo, Vaimoso**Faletua:** Moevasa Leleianoa Tanielu Leaana**Nuu:** Auala, Siusega, Safotu.**Aso Faaipoipo:** 16 Ianuari 1984**Soifua Galue i le Ekalesia:** Faifeau EFKS Glenwood - 15 Iulai 1995. Sui Faifeau Komiti A'oga, Sui Faifeau Komiti Feau Eeseese, 30 tausaga 1 masina o galulue i le Aulotu EFKS Glenwood Sydney.**Tofi i le Ekalesia:** Faifeau Toeaina**Aulotu:** EFKS Glenwood Sydney**Pulega:** Sini Tutotonu**Matagaluega: NIUSAUELESE I SISIFO****4) Suafa: ISAAKO IOSE PATEA FT****Aso Fanau:** 28 Oketopa 1955**Nuu:** Sapunaoa, Magiagi, Sapapalii**Faletua:** Tavai Patea**Nuu:** Foua Salelologa, Vailoa Palauli**Aso Faaipoipo ai:** 23 Mati 1985**Soifua Galue:** 1990-1995 Tiakono EFKS Takanini 1996-1999 Kolisi Faafaifeau Malua 23/12/2000 Osi feagaiga ma le Aulotu EFKS Villaword, Sini Matu, Niusaelese Ausetalia O loo galulue ai nei ua 25 tausaga.**Tofi i le Ekalesia:** Failautusi Pulega Sini Matu-5tg Failautusi Matagaluega Niusaelese-5 tausaga**Komiti Tupe-5** tausaga**Komiti Au Toeaina-4** tausaga**Komiti Faatonu Matagaluega Niusaelese-3** tausaga**Aulotu:** EFKS Villawood**Pulega:** Sini Matu**Matagaluega: NIUSAUELESE****5) Suafa: AUFAGAFAAFIA****MAUALAIVAO FT (Ua maliu)****Aso Fanau:** 14 Aperila 1955**Nuu:** Malie, Afega, Faleasiu, Safune Savaii**Faletua:** Sina Aufaga Faafia**Nuu:** Nofoalii, Fasitoo-uta, Vaimoso**Aso Faaipoipo:** 27 Ianuari 1984**Soifua Galue:** Failautusi Matagaluega Niu Sila Saute - 13 tausaga Komiti Au Leoleo Toeaina Pulega: 2014 - 2025 38 tausaga o le auaunaga.**Faletua:** Teutupe Pulega

Failautusi TPT Matagaluega

Failautusi Matagaluega

Komiti Tupe Matagaluega

Taitaifono Mafutaga Aoao Tina 2017 - 2018

Tofi i le Ekalesia: Faifeau Toeaina Pulega

Ueligitone i Matu.

Aulotu: Cannons Greek (ALIA O LE KANONA)**Pulega:** Ueligitone i Matu**Matagaluega: LAUMUA O AOTEAROA.****6) Suafa: TAUTUAAURELIO FT****Aso Fanau:** 16 Novema 1957**Nuu:** Fogatuli, Faatoia, Auala**Faletua:** Naomi Simanu Aurelio (ua maliu)**Nuu:** Satalo Falealili, Saolufata Anoamaa

Aso Faaipoipo: 7 Ianuari 1984
Soifua Galue: 9/4/1994 - Osi Feagaiga ma EFKS Vaigaga, Faleata.
3 Tausaga o Usufono Mtg APIA i SISIFO a o le'i vaeluaina le Matagaluega. Silia foi ma le 9 tausaga o Usufono a le Mtg Faleata i le Komiti Atina'e.
Ianuari 2017 na avefa ma Failautusi Pulega Faleata i Sisifo, sui ia Fa'aauga Mata'utia FT; na faamaonia le tofi Toeaina i le Fono Tele o lena lava tausaga.

Tofi i le Ekalesia: Komiti Feau Eeseese, Komiti Atina'e, Failautusi Pulega Faleata Sisifo, Toeaina Pulega Faleata Sisifo.

Aulotu: EFKS Vaigaga
Pulega: Faleata Sisifo
Matagaluega: FALEATA

7) Suafa: ISAAKO VIKI FT
Aso Fanau: 13 Me 1955
Nuu: Salamumu
Faletua: Pereise I. Viki
Nuu: Faatoia
Aso Faaipoipo: 17 Mati 1982
Soifua Galue: Au Taumafai, Komiti Faamisionare, Komiti A'oga, Komiti Tupe, KFE, KAK, Komiti Au Toeaina.

Tofi i le Ekalesia: Failautusi Matagaluega Faifeau Toeaina

Aulotu: EFKS Levi Saleimoa
Pulega: Malua i Sisifo
Matagaluega: MALUA

8) Suafa: FAASAVALEILUA TINAI
Aso Fanau: 27 Iuni 1955
Nuu: Fusi Safotulafai, Sapapalii, Aapai, Faleaseela, Saleapaga, Fakaofo Toelau.
Faletua: Lina Leilua Tinai
Nuu: Falevao, Siutu Salailua, Saleimoa.
Aso Faaipoipo: 4 Fepuari 1986
Soifua Galue: 1982-'86 Kolisi Faafaifeau Malua, 1988 Faaui Faifeau Samoa, 1986-2025 Faifeau Tausinuu (39 tausaga galue faafaifeau).

Tofi i le Ekalesia: Failautusi Pulega Salega Komiti Tupe Mtg Faasaleleaga Toeaina Pulega Komiti KAK Matagaluega

Aulotu: EFKS Faiaai
Pulega: Salega Matagaluega FAASALELEAGA.

9) Suafa: ESERAAUATAMA ESERA FS
Aso Fanau: 16 Aperila 1955
Nuu: Laulii, Moataa, Satalo Falealili
Faletua: Tamara Ola Esera
Nuu: Luatuanuu, Lotofaga, Vaiusu
Aso Faaipoipo: 28 Me 1981 (44 tausaga)
Soifua Galue: 1987-1990 Kolisi Faafaifeau Malua 1991-1993: PTC Suva Fiti.
1994-1996 Faiaoga Malua, Faaui FS
1997-2025 Faifeau Tausinuu Sapapalii

Tofi i le Ekalesia: Komiti Faamisionare, Komiti o Atina'e, Failautusi Pulega Safotulafai 2023 (5 mth) Sui Taitaifono Fono Tele 2023 (4 aso), & 2024-2025, Taitaifono Fono Tele 2023-2024.

Aulotu: EFKS Sapapalii
Pulega: Safotulafai
Matagaluega: FAASALELEAGA

10) Suafa: TUPEFAAVAE ROPATIAUELUA FT
Aso Fanau: 26 Iuni 1959
Nuu: Lepa
Faletua: Salamasina Satele Auelua
Nuu: Vailoa-tai, Amerika Samoa
Aso Faaipoipo: 2 Iuni 1984
Soifua Galue: 1981-1984 Kolisi Faafaifeau Malua 1985-1991 Faifeau Tausinuu EFKS Safaato'a-tai, 1992-2025 Faifeau Tausinuu EFKS Fale o le Fai Ipu Omea, San Bernardino, California USA.

Tofi i le Ekalesia: 1985-2025 Faifeau Tausi Nu, 2022-2025 Failautusi Pulega i Saute, Komiti Atina'e Matagaluega Amerika, 2020-2021 Failautusi Pulega i Matu, Komiti Faamisionare Matagaluega Amerika.
Aulotu: EFKS Fale o le Fai Ipu Omea, San Bernadino, California Amerika

Pulega: Pulega Matu & Pulega Saute
Matagaluega: AMERIKA

11) Suafa: FUATA'I FUATA'I SIMANU FS
Aso Fanau: 2 Mati 1955
Nuu: Saoluafata, Lufilufi, Sapunaoa
Faletua: Vaotumua Misipele Setefano Simanu
Nuu: Fasitootai, Leauvaa, Vaipuna
Aso Faaipoipo: 23 Aokuso 1997
Soifua Galue: 22 Setema 2000-Osi Feagaiga ma le EFKS Satalo Falealili.

Tofi i le Ekalesia: 2005-'07, 2022-'24 Au Taumafai, 2015-2017 Au Leoleo

Aulotu: EFKS Satalo
Pulega: Falealili
Matagaluega: FALEALILI SAFATA SIUMU

12 Suafa: KUATEMANE ULUTUI FS
Aso Fanau: 10 Tesema 1959
Nuu: Foua Salelologa, Lona Fagaloa, Apolima-uta, Sasina, Matatufu
Faletua: Falesau Poasa Ulutui
Nuu: Afega, Amaile, Satoalepai, Saanapu Fasitoo-uta, Sapapalii.
Aso Faaipoipo: 3 Aperila 1993
Soifua Galue: Kolisi Faafaifeau Malua 1983-1986
Kolisi Faafaifeau Pasefika Fiti 1987 - 1989
Faia'oga Kolisi Faafaifeau Malua 1990 - 1992
Pule Falelomitusi Ekalesia 1992-1994, 2009-2011
Teutupe Ekalesia 1994-1998, 2011 - 2015
Tausinuu EFKS Apolima-uta 1998 - 2003
Tausinuu EFKS Ketesemane Ueligitone 2015-2025
Tofi i le Ekalesia: Sui Faifeau Komiti Faamisionare Laumua o Aotearoa 2022 - 2025
Aulotu: EFKS Ketesemane
Pulega: Ueligitone i Matu
Matagaluega: LAUMUA O AOTEAROA

13 Suafa: SILI MO'A SILI FS
Aso Fanau: 20 Setema 1959
Nuu: Fasitootai, Samatau, Manono
Faletua: Logola Sili
Nuu: Vailuutai, Faleaseela, Saoluafata
Aso Faaipoipo: 31 Aokuso 1987
Soifua Galue: 2009-2012 Kolisi Malua
2014-2025 Tausinuu EFKS Forest Lake
Tofi i le Ekalesia: Faifeau Samoa
Aulotu: EFKS Forest Lake
Pulega: Purisipeni i Saute
Matagaluega: KUNISELANI I SAUTE

14) Suafa: NIUETASI AUPAAU FS
Aso Fanau: 10 Ianuari 1959
Nuu: Pata Falelatai, Vailele
Faletua: Senetima Aupaau
Nuu: Siufaga Falelatai
Aso Faaipoipo: 25 Me 1980
Soifua Galue: Ulufale Malua 1999-2002
Tausinuu EFKS Lalomauga 2003-2005
Galue EFKS TV 2011-2015
Tausinuu EFKS Maaola Talalelei 2016-2025
Tofi i le Ekalesia: Faifeau Samoa
Komiti Atina'e

Aulotu: EFKS Maaola o le Tala Lelei, Redcliffe, Brisbane.
Pulega: Purisipeni i Saute
Matagaluega: KUINISELANI I SAUTE

15) Suafa: FAALENUU TAGATAESE FS
Aso Fanau: 30 Oketopa 1954
Nuu: Saleilua Falealili
Faletua: Henrietta Tagataese
Nuu: Afega, Tuamasaga
Aso Faaipoipo: 18 Iuni 1997
Soifua Galue: Kolisi Faafaifeau Malua 1986-1989
Ofisa Aoaoga Kerisiano 1990-1997
Tausinuu EFKS Levili 1998-2025
Tofi i le Ekalesia: Au Taumafai Mtg Apia i Sasa'e 2008-2014
Failautusi Pulega Vaimauga i Sisifo
Aulotu: EFKS Levili
Pulega: Vaimauga Sisifo
Matagaluega: VAIMAUGA.

O le sauniga lotu e aloaia ai le tauaaoina atu o tofi Penisione o le aufaigaluega, sa faia i le Aso Lulu 21 Me 2025. Na ta'ita'i le sauniga e le afioga Taitaifono Fono Tele, susuga Tunumoso Soliola Iosia FT; o ia foi na faia le lauga. O le Tusi Paia na faitauina e le Failautusi Aoao o le Ekalesia, susuga Dr. Taipisia Leilua FS, a o talosaga na ta'ita'iina e le afioga i le Sui Ta'ita'ifono Fono Tele, susuga Enefatu Lesa FT (na filifilia i le Aso Gafua i le amataga o le Fono Tele).

O le tolaulauina o suafa o le au penisione ma o latou talaaga, faapea lo latou soifua galulue ma tautua ai i le Ekalesia, na saunoa i ai le Failautusi Komiti Au Toeaina, susuga Amuia Seuala FT. O le tau'a'aoina atu o tusi aloaia, o pine faamau faapea meaalofa tupe a le Ekalesia, sa nafa lea ma le ta'ita'i o le sauniga, a o lona faletua ia Susana TS Iosia na faafeiloai ma faa'ula ia te i latou fai ma sui o le Ekalesia Aoao.

O le amataga o lenei Fono Tele, na pasia ai le siitia o meaalofa tupe mo le au penisione, mai le \$5,000 sa i ai, i le toe faaopoopo o le isi \$5,000 atoa ai le \$10,000. O lenei mataupu o se Mau mai le Matagaluega Apia Sasa'e, taula mai le Komiti Faamisionare. Ua avea ai lenei siitaga tele o faamanuiaga mo penisione, o se tasi o pine faamau o le Faamanatuina o le 150 tausaga o le Fono Tele a le EFKS. Ia faamanuia tele le Atua i le aufaigaluega ua a'e malo le faatautaiga, o le soifua molimau mo le Tala Lelei. Ia fai ma viiga o le Atua lo outou soifua.

LAUGA O LE FONO TELE

(Saunia Toeaina Penisione, Peteru Tone FT)

Tusi Faitau: Iosua 9: 3 - 21

Manatu Aoao Vaiaso: OLAILE FANUA

Manatu Autu Aso Lua, 20 Me 2025: O SE FUAUFUAGATAUFAASESE (A cunning plan).

O le malaga faalefaatuatua a le nuu o le Atua o Isaraelu agai i le nuu folafolaina ma le faataunuuina o folafolaga o faamanuiaga a le Atua mo i latou. O le ata lava foi lea, o le malaga faalefaatuatua o loo tatou savavali ai, agai i le lumanai i le faataunuuga o folafolaga o faamanuiaga a lo tatou Alii o Iesu Keriso mo tatou.

A e o Isaraelu i le Feagaiga Tuai, sa moomia e le Atua le fai ma molimau i lona finagalo paia i le lalolagi. Ma o lo latou faamaoni i ai i le faamoemoe lea, e faalagolago i ai le taunuu lelei o lo latou valaauina. “O le Faavae lea o le Malo o le Atua i le lalolagi.” Ma o le mea lilo mo le manuia o faatinoga eseese, o le soifua tauivi o Isaraelu - “O le usitai i le finagalo o le Atua.” Ma o le usitai, sa avea o se a’oga aoga ma taua mo tagata Isaraelu i le faatinoga o le latou auunaga i le Atua. Peitai o le latou pa’u maulalo, mai le tulaga maualuga, o le faamoemoe lea. Pei ona tatou iloa mulimuli ane ai - i le olopalaina o le nuu e ona fili. O le susunuina o le malumalu, ma le faatafea o le nuu i atunuu ese. A e o le faamoemoe o le Atua, o loo i ai pea mo lana Isaraelu fou, o lana Ekalesia, ua filifilia ma valaauina e Keriso, e molimau i lona alofa faamagalo, mo le lalolagi atoa. Mo le Ekalesia, o folafolaga o faamanuiaga a le Alii, o loo tatou agai pea i ai i lona faataunuuina. Ua tatou tofo i ai i lona matagofie, a e o loo tatou agai pea i le lumanai i lona fa’aatoatoaina.

I le Tusi a Iosua, o le tulaga ua oo i ai le malaga a le nuu o le Atua, ua uma atu faigata o le toafa, a o lea ua amata faigata o Kanana. Ua sauni e tau taua e faatoilalo ai nuu ma aai malolosi o Kanana, ma ulufale ai i le laueleele folafolaina o le a fai mo latou. O le aai o Ieriko, ma le aai o Ai, o aai muamua ia e tu tuaoi na faatoilalo e Iosua ma Isaraelu. O Ieriko o se aai malosi ma malu puipua i ona pa maualuluga, ma o lona tulaga tu tuaoi, sa faalagolago i ai puipuga saogalemu o nisi aai i le ogatotonu o Palesitina.

Ma o tala o le faatoilaloina o Ieriko e Iosua ma Isaraelu, o se tala talia gata, ma faatupu fefe ma popole, mo nuu ma aai o Kanana. Ona o se tulaga

ese o le mea na tupu. Ma e pei ona afea i lauga o lena vaiaso ma lenei foi, i le Tusi a Iosua - fai mai na ona ili lava o pu a ositaulaga Isaraelu, a e solo i lalo pa malolosi o le aai. I su’esu’ega a le au popoto, i toega o le aai tuai o Ieriko, o loo fa’aalia ai le maoa’e o le atamai na fausia ai pa o le aai, i le tulaga ese o le lautetele o pa. Ma o se tulaga faigata ona malamalama i ai le toatele, ona o le aai malosi o Ieriko, na solo i lalo ona pa, i le iliga o pu a ositaulaga Isaraelu.

Fai mai le lauga a se tasi Toeaina o le Ekalesia ua levaleva atu, “Na ona ili lava o pu a ositaulaga, a e talepe e le Atua le pa. Na faapefea ona talepe? E le o ta’ua maia. A e ai lava foi, o se tasi lenei o mea taua o lenei tala - E pei ona ta’ua e nisi o failauga o le Tusi a Iosua - ia iloa gofie e tagata le faatauva o le mea na fai e Isaraelu. A e tele le mea o loo fia faatupuina ai. Ai foi o loo fia ta’u mai e le tala, ia Isaraelu mulimuli ane ai, E le o i latou, a e o le Atua na malepe ai le pa malosi o Ieriko.

E le o Ieriko le faamamafa o la’u lauga. A e pei o lo’u manatu, o i, i le maualuga o le fefe ma le popole i le ala na faatoilalo ai le aai malosi o Ieriko, na mafua ai ma pogai ai ona fafau e Kipeona lana togafiti faa’ole’ole. I le manatu, e ono fai foi e Iosua ma Isaraelu lenei faiga mata’utia, e faatoilalo ai i latou. O Kipeona o se tasi o aai taua, o se aai iloga i le ituaiga o Peniamina, e i le itu i saute o Ierusalem. O ituau a Kipeona ma ona toa, ua popolevale i le fefe i tala o osofaiga a Iosua. Ua latou o ai ua talosaga le osia o se feagaiga mo se filemu ma latou. Ua latou ofoina atu i latou e fai ma auuina ia Isaraelu. Ua latou faatinoina se togafiti taufaasese - faapea o latou e mamao le mea e o mai ai, ma ua vaivai, ua mafatia lava. O le faamoemoe ia faatupu ai lagona alofa o Iosua ma Isaraelu mo latou, ma faafaigofie ai ona talia le latou togafiti ma faasaoina ai latou.

Ua latou fa’aalia, o a latou areto sa sauni o le latou oso sa vevela, a o lea ua magumagu ma momomo, ona o le mamao o le mea na latou o mai ai. O a latou fagu uaina sa fou, a e ua masaesae fagupa’u sa utufia ai. O latou ofu sa fou, a e ua masaesae foi, ma o latou seevae ua pala, i le mamao o le mea na latou o mai ai. O se togafiti atamai lenei i lona faatinoga ma lona faaupuina. O se pepelo foi, e lelei ona faaupu ma faatino. Ua latou faasese ai Iosua, i lo latou faafoliga mafatia. Ma, na talia gofie ai i le fa’aaloalo o Iosua, ma lona le iloa, o le togafiti taufaasese. O le fa’aaloalo ua faia ai e Iosua le mavaega ma Kipeona,

ma osi le feagaiga e ola ai i latou. Ua tauto foi Iosua ma le faapotopototo uma o Isaraelu, e faasaoina i latou. Peitai o le tolu o aso na maua ai tala ma iloa e Iosua, o le togafiti taufaasese le mea ua fai e Kipeona. A e foliga, ua le faigofie ona faaumatia Kipeona i le latou mea valea ua fai, ona o le tautinoga faatautoga ua uma ona fai e Iosua ma Isaraelu ia Kipeona - o le a faasaoina i latou. Ma o le i'uga ua faasalaina i latou, o le a nofo pologa, ma avea ma auauna fai fafie, ma auauna utuvai, mo le faapotopotoga o Isaraelu, ma le fale o le Alii. Ma o le latou auaunaga e oo i le i'uga, o le latou faalumaina foi lena e faavavau. Ma e ui ina faasalaina, a e ua taunuu lelei lava taumafaiga a Kipeona i le mamao lea ua i ai - ua faasaoina lo latou ola i totonu o le Feagaiga ma le Tautinoga faatautoga ua uma ona fai i ai e Iosua ma Isaraelu.

Peitai na ala mai lea faatinoga, i le le fesili o Iosua i le ta'ita'iga a le Atua mo ia tulaga. I le Tusi o Numera 27:21 o loo ta'ua ai sa a'oa'oina Iosua e faatali i mea e finagalo ai le Atua, e oo mai i le tagata, i le fa'aaogaina o le URIMA a le au ositaulaga. E oo mai ai le fa'aaliga ia i latou, i se mea e finagalo ai le Atua. A e i le tulaga o le mea lenei, ua le sailia. E pei e foliga, ua seetia Iosua ma alii o Isaraelu, i tala o lo latou maoa'e. Ma e foliga mai foi, ua le taua tele, i le tulaga o le mea lea ua fai ma Kipeona. Ana latou sailia le finagalo o le Atua, semanu latou te maua le faasinoga, ma ono latou iloa ai, o le togafiti taufaasese i le amataga. A e ua le sailia e Iosua lea tulaga. E pei sa manatu Iosua iinei, "O le saili i le finagalo o le Atua i sia mea, e le moomia ona e foliga mai e le o se mea faigata tele". Peitai, fai mai le Tusi Paia, "*O le faamaoni i mea iti, e faamaoni foi i mea e tele.*" E sese lava tagata uma. A o tagata o le Alii, e a'oa'oina ia latou mea sese e fai. O le faalua ai lea ona fai e Iosua o le mea sese lea e tasi, talu ona latou sopoia le Ioritana. O le le fesoota'i i le Atua, i le mea e finagalo i ai e fai. O le le fesootai i le Atua, ma ia auina muamua ai na o nai tagata toaititi i le aai o Ai. I le manatu, o Ai ua na o sina aai laititi e le malosi. O le le fesootai foi i le finagalo o le Atua, na faia ai le feagaiga lenei ma Kipeona. E pogai i le le manatua o le Pule faasoa a le Atua, ua faia ai mea e aunoa ma le fesootai ma ia. E aoga lava mea sese e a'oa'oina ai lesona aoga. Ma amuia lava tatou, e liliu uma a latou mea sese, e fai ma falea'oga e a'oa'oina ai suiga lelei i o latou olaga fesootai i le

Atua. O le faataunuuina o le Tautoga i tagata Kipeona, o le faasaoina lea o latou ola. O le le faatagaina o Isaraelu e faamuta le tautoga ia Kipeona, tusa lava pe ua latou faaseseina i latou, ua a'oa'oi mai ai Keriso ia i tatou i le Tusi Paia, "*O le leaga e fai mai e o tatou tuaoi, e le mafai ona sa'o ai lo tatou faia o se isi mea leaga ia i latou. E ao ai ona tatou faatoilaloina le leaga i le lelei.*" Ma o amioga faapea, e tulaga ese ai tagata o le Atua mai isi tagata uma. Aua e le o amio faalelailolagi, tatou te manumalo ai i le lalolagi.

Ia atonu e manatu nisi pei e le afaina tele - e leai se leaga tele o i ai i le taumafaiga a nai nei tagata Kipeona e tau saili se auala e lavea'iina ai i latou. A o le faalavelave, ua latou faia i se auala taufaasese ma pepelo. O le ala i le faiga o se mea sese, o le ala aga'i i lalo. Soo se togafiti taufaasese lava, e moomia se pepelo e ufiufi ai. Ua tatou iloa, o le pepelo mai lava i le amataga, o loo tumau pea o se tasi o auupega a le tiapolo, e faigofie tele ona faatoilaloina ai i tatou. Ma o soo o Iesu, mai le amataga, e oo mai lenei taeao, e ono latou a'oa'oina le tele o lesona lelei i lenei mea. Peitai, ua tatou iloa i le Tusi Paia, e le faigofie mai le tulaga faalelailolagi o loo siomia ai tatou. Tatou te toilalo gofie lava i le pepelo. Aua fai mai Luka 16:8, "*O fanau o le lalolagi, e popoto atu, nai lo fanau o le malamalama.*"

Ioe, le paia o le Ekalesia i lenei taeao, e ono tatou pa'u'u gofie lava i le sese i le faatinoga o se mea, pe a tatou le sailia le faasinoga a le Alii. O le tagata atamai e sili ona ia moomia se malosi e sili atu, nai lo lana ia lava faamasinoga, e ta'ita'iina ai o ia, i mea faigata o le olaga. Aua fai mai le Tusi Paia, Faataoto 3:6, "*Ia e manatua o Ia i ou ala uma, ona faatonuina ai lea e Ia lava ou ala.*"

Ioe, o tala o le savaliga faalefaatuatua a le nuu o le Atua i le Feagaiga Tuai, o loo tatou iloa ai, o se tasi o mea taua e moomia mo tatou i la tatou foi tauiviga agai i le lumanai, i manuia ua saunia ma folafola mai e Keriso mo tatou. "O lo tatou usitai lea i le faasinoga

ma lana ta'ita'iga i le ala o loo tatou savavali ai. O lou usitai i le finagalo o le Alii, o le ala lena e te iloa atili ai mea e finagalo ai le Alii mo oe. O le lē usitai, o le lē faamaoni lava lena, e mamao ese ai lo tatou faamoemoe mai le mea e finagalo ai le Alii. O lona uiga o mea sese tatou te faia, e le auai i ai le Atua, a e na ona atili ai ona mamao ese le mea tatou te i ai mai ia te Ia. O mea e i ai le Alii, tatou te iloa i lo tatou vaai ia Keriso. Vaai i ai pe o foliga ia te Ia mea o loo tatou fai? Aua o Keriso, o le fa'aaliga atoatoa o le Atua ia i tatou. Ma o le fua lea e tasi tatou te iloa ai lona faatasi ma tatou i mea tatou te fai - "O lo tatou vaai ia te ia." E moni ua 'au mai le Agaga e tau toalua ma tatou, a e ia tatou faaeteete foi, aua o loo molimau le Tusi Paia, "*E le tasi se Agaga.*" Ma e tatou te iloa o le Agaga moni o Keriso lea, i lo tatou vaai ia te Ia. Aua e le feteena'i mea sa fai e Keriso, ma mea e fai e lona Agaga ia i tatou. Aua nei o tatou faia ma le iloa ni mea sese - aua e atili ai ona tatou le iloa gofie foliga alofa moni o Keriso.

O le manatu autu o le Fono Tele o lenei tausaga - "O loo i le valaau e sauniuni ni o tatou oso. Aua e toe aso tolu, ona outou sopoia atu ai lea o Ioritana nei, ma o atu, e fai mo outou le nuu ua foa'iina mai e le Alii lo outou Atua ia te outou e fai mo outou." I lo'u manatu, o le oso lelei lava mo le tatou malaga faalefaatuatua, "o lo tatou usitai i le finagalo o le Atua." O le oso lelei lena, e taunuu lava i le mea o loo tatou malaga i ai, o loo tumau pea lona lelei mo tatou. E le pala, e le momomo i fesuiaiga o le tau, ma le tele o faigata i le ala.

E i ai lava le Alii ma tatou. O le ta'utinoga malamalama lea a le Tusi Paia. Ma o le faanaunaga sili lea o Keriso - ia iloa e tagata uma lava, o loo i ai faatasi o Ia i soo se mea tatou te i ai. Lelei - Leaga. Faigata - Faigofie, e i ai pea o Ia o loo tatou Taiala, e saogalemu ai le malaga pe a tatou le faatamala. Ai ai le Alii ma tatou, o Ia e faamalosi, e faamafanafana ma faafiafia tatou e atia'e mea lelei, ma faatoilalo le fili.

Ia manuia taualumaga o le Fono Tele i lenei aso, ma lenei vaiaso. Amene.

**(Saunia susuga Peteru Tone FT
Toeaina Penisione,**

A'OA'O FAAU'U FAIFEAU SAMOA, FONO TELE 2025

<u>A'OA'O</u>	<u>FALETUA</u>	<u>MTG</u>
1 Asoiva Saofa'i	May	Niu Sila i Saute
2 Ata Lemana	Kuinimeli	Aukilani
3 Collin Faletoesa	Aifala	Apia
4 David Mafua	Leah	Faasaleleaga
5 Faafoi Atonio	Tulaga	Faasaleleaga
6 Faamoana Fuimaono	Soonasiva	Falealili SS
7 Ioane Samuelu	Lufi	Lotofaga LA
8 Laau Mila Tanielu	Faalaniga	Aukilani
9 Limuaa Fue	Kate	Apia Sasa'e
10 Mika Su'esu'e Te'o	Taliilagi	Falealili SS
11 Oata Leiataua	Tuafale	Malua
12 Paie Legalo	Lolatosi	Lotofaga LA
13 Paulo Sepuloni	Taufau	Faasaleleaga
14 Pelenato Liufau	Susana	Itu o Tane
15 Peni Manila	Florance	Faleata
16 Vite Tuipolosa Kalepo	Ferite	Malua

E pei ona masani ai i polokalame o le ulua'i vaiaso o le Fono Tele, o le Sauniga o le Faauuga na faia i le Aso Toonai 17 Me 2025, i le malumalu o le Fale Iupeli. Na ta'ita'i le susuga Leaso Tupa'i FT, faitau Tusi Paia le susuga Aila Patea FT, tatalo Auvaa Peseta FT. O i latou na faae'elima: Leaso Tupai FT, Asotasi Gu Time FT, Faleulu Malaulau FT, Isaako I. Patea FT, Pati Vili FT, Tunumoso S. Iosia FT. O le Failautusi Komiti Au Toeaina, susuga Amuia Seuila FT na tuuina atu A'oa'o ma latou Faletua mo le faau'uina. Ia faamanuia le Atua i lo outou avefaa ma auauna o le Upu ma Sakarameta.

FAAGASOLOGA O LE FONOTELE 2025

Manatu Taiala: “O le Ekalesia ma le Nu'u Folafoalaina: Foa'iina mai e fai mo outou”

(The Church and the Promised Land: Given for you to possess) Iosua 1:11e.

“o le mana'o ua taunuu, o le laau o le ola lea.”

O le tuana'i ai o le Aso Sa Tina, na amata gasolo ai le Fonotele o lenei tausaga, ma amata ai le ulua'i vaiaso o fonotaga a komiti, i le fono a le KAT ma le Lotu a le Au Toeaina i le afiafi o le Aso Gafua, 12 Me. Ona faagasolo ai lava lea o fono a komiti eseese, ma sauniga i le afiafi e pei ona masani ai i tausaga taitasi. O le Aso Faraile o le ulua'i vaiaso, na faia ai le sauniga lotu e faamanatuina ai le 150 tausaga o le Fonotele (1875 - 2025). O le susuga Tunumoso Soliola Iosia FT, le Taitaifono Fonotele 2025, na ta'ita'i le sauniga i le Fale Iupeli. O le Tusi Paia na faitauina e le Failautusi Aoa, susuga Dr Taipisia Leilua FS, o ia foi na faia le tala ootoo o le Tala Faasolopito o le 150 Tausaga o le Fonotele. O le afioga Sui Taitaifono, Esera Auatama Esera FS na saunia tatalo.

Sa valaaulia faapitoa le sui o le FGFL e auai ina ia molimaui lenei aso taua, faapea foi sui o le Malo Samoa, le Ao mamalu o le Malo ma lana Masiofo faapea le Tamaitai Palemia, aemaise o le Taitaifono EFKAS ma Ta'ita'i o Ekalesia Kerisiano i Samoa nei. Na mae'a le sauniga ona mapu ane lea i le malae i luma o le Fale Mafutaga, mo le faapaiaina o le Keke o le 150 tausaga, o le taumafataga ma fa'aalologa maua luga, na saunia e le Ekalesia e pei ona sa faafoeina e le Komiti Feau Eseese. O le Pese faapitoa mo le 150 tausaga Fonotele, faapea faafiafiaga matagofie saunia lelei, sa faia e le Kolisi Faafaifeau Malua, i le ta'ita'iga a le Alii Pule Porofesa Faifeau. O le 150 tausaga Fonotele na 'au'au i ai tualumaga o le Fonotele o lenei tausaga, ma sa iloa gofie lea tulaga, i le teuteuina lelei o le aai i Malua, faapea maota ma laoa o le nofo a Pulega, i le faia o fu'a ma faalauiola felanua'i.

O le taeao o le Aso Toonai na sosoo ai, sa faia ai le Sauniga masani o le Faauuga o Faifeau Samoa. E to'a 16 i latou na faauuina i lenei tausaga, e fai ma Faifeau o le Upu ma le Sakarameta. O le susuga Leaso Tupa'i FT o Faasaleleaga na ta'ita'i i lea sauniga, sa faatautaia e sui o le Komiti Faatonu a le Au Toeaina. Ao le aoauli mulimuli ane ai, na faia ai le Lotu a Tupulaga o le Ekalesia. O le sauniga o lenei tausaga sa faafoeina e le Matagaluega FALEATA, na ta'ita'i le susuga Iosefa Afutiti FS (Failautusi/Toeaina faaolioli, Pulega Faleata Sisifo).

Ona alo ai lea o Tupulaga Faleata i faafiafiaga saunia lelei ma le matagofie, mo le silasila a le usugafono o le Fonotele o lenei tausaga. Na tualuga le ulua'i vaiaso o le Fonotele i le tufatufaina o Faila mo le Fonotele. O lenei galuega tele e tusa ona masani ai, sa nafa ma le Ofisa Tutotonu i le ta'ita'iga a le Failautusi Aoa ma le Teutupe o le Ekalesia. O le vaiaso muamua foi lea sa faagasolo ai le Fono a Tupulaga Talavou. O sauniga lotu ma le Talisuaga Paia o le Faamanatuga i le Aso Sa, na tolaulauina ai suafo o le aufaigaluega mai le nofo a Matagaluega, ua afe moe le faiga malaga talu mai le Fonotele o lenei tausaga 2024.

O le ulua'i mataupu o le Fonotele o lenei tausaga, o le sailiga lea o se Sui Taitaifono e sui tulaga i le susuga Esera Auatama Esera FS, ua sauni e Penisione. Ma o lenei Sui Taitaifono pe afai e tofia, o le a nofoia le nofoa Sui Taitaifono mo le 5 aso (Aso Gafua - Aso Faraile) ona se'e atu lea e Taitaifono pe a mae'a le fonotaga o lenei tausaga. Sa le'i faigofie felafolafoa'iga i lenei mataupu, a e na faai'u lava i le fulisia e fai le palota mo lea faamoemoe. Ma o le i'uga, na manumalo ai le susuga i le Toeaina o Enefatu Lesa FT o le Matagaluega Vaimauga (EFKS Tanoalei'a), e avea ma Sui Taitaifono.

Na mae'a ona fai suiga o le Laulau o le Fonotele, ona faagasolo lea o le Fono e pei ona masani ai - Faamaonia Iugafono 2024, Mau mai Matagaluega, Mau mai Komiti, Faamaonia Galuega a Komiti o le tausaga, Tala o Tupe, Tala o Faiga Taulaga 2024, Lipoti a le Su'etusi, Tala Faatatau o Tupe 2025-2026, Faamaonia Failautusi Matagaluega.

Na tualuga le Fonotele e pei ona masani ai, i le sailiga lea o le Sui Taitaifono mo le isi paeai. O le fesili tele masani i lea taimi, pe mata e toe tula'i mai le Taitaifono o i ai nei, pe o le a suia? Na maua le tali ina ua mae'a le palota, sa finauina e le susuga Tunumoso Soliola Iosia FT (308 palota) ma le susuga Palemia Reupena Tauiiili FT (433 palota). Na saunoa faafetai le Toeaina o Soliola i le Ekalesia i le faatuatuaina o lana ta'ita'iga mo tausaga e tele, ma na faamanuia foi i le Laulau filifilia o lenei tausaga. Na fai le fesuiaiga o le Laulau, ona ta'ita'i lea e le afioga Taitaifono Fonotele, susuga Enefatu Lesa FT, o le lotu faai'u e tapunia aloaia ai le Fonotele o lenei tausaga. Malo le faatofala'i. Viia le Atua i lana taitaiga, ua i'u manuia ai le faamoemoe o le Ekalesia.

O LE PEROFETA MULIMULI

(O le tala faafagogo faaliliuina mai le tusi, 'The Last Oracle' tusia e James Rollins)

A o setusetu atu Monike i lona vae sa faananati lona fusiga, na ia manatunatu pe na faapefea ona ia malamalama lelei i mea tau eliga maina. Pe na aafia ai lona aiga –

Na faafuase'i ona fe'emo mai lona mafaufau le faasologa o ata pei ni matauila: o se toeaina matua i ona ofu ovalola, pisipisia uma i le pefu o koale..o le toeaina lava lea e tasi i totonu o le pusa maliu..o se tina o loo tagi...

O se tiga matuitui pei se sipaka i le eletise na motusia ai le faasologa o vaaiga i le mafaufau.

A o oono i le tiga, na ia ta'ita'i atu tamaiti ma Marata e ui atu i se lavelave o fusipa'u e noanoa ai taavale la'u koale, o auala mo taavale koale, ma mea e sasa'a ai koale. O se isi pea o auala na taunuu atu i se avanoa i le papa malifa. O le ulufale autu lea i totonu o le maina.

A o latou kolosi atu, na tilotilo atu Monike i luga o lona tau'au.

Na taatia mai lalo le Vai o Karakei. Na manatu Monike e lua maila le lautele i inei, ma faatoluina lona umi.

“Ua tatau ona tatou faanatinati.” Na faamanatu atu ai Konesetatino.

Na luelue atu le ulu o Monike. Na savali atu le tama matua i le va o le au laiti. Na mulimuli atu Marata. Na ia taitai atu i latou agai i le avanoa.

Ina ua latalata atu, na ia iloa ai se faafitauli. O se poloka lapo'a fausia i laupapa ma ogalaau, na poloka atoa ai le avanoa mai le fola agai i le taualuga.

E mai le tulaga sa taatia ai le itu i fafo, e foliga mai ua leva e le'i oo mai se tagata iinei.

Peitai na iloa atu e Monike se faaputuga o muli sikaleti, ma atigi fagu malosi o taatitia i le pito i lalo o le poloka. Sa iloga foi tulaga seevae fou i le fola oneonea. O le maina i lalo sa le'i tuufua e pei ona faafoliga mai ai. Sa i ai se tagata na fai sana malologa iinei talu ai nei.

Na tilotilo atu Monike i ona tua. Sa le'i i ai ni loli o paka ai po o ni tulaga pa'u lata mai o ni taavale na pasia le nofoaga, o lona uiga o le tagata sa iinei na tuumuli atu i se isi auala. Ua uma ona faamatala mai e Konesetatino lona auala.

O se nofoaafi i lalo o le eleele na ui atu i lalo o le vai mai le Maina Lavelave 337 i lalo agai i Keliapinisiki 88.

O ai lava sa galue i totonu o maina e tatau ona ulufafo atu i le isi itu.

Na tatalo Monike ia 'aue nei o latou fetau ma nisi i le faitotoa i tua.

Na ia kolosi atu i le faatafafa o u'amea tutu'i na seti i totonu o le poloka.

“O le a le mea o le a tatou faia?” na fesili ai Monike. “E tu'itu'i?”

Na faanunumi Konesetattino ma kolosi atu i le faitoto'a. Na ia sii i luga le loka ma tulei atu. Na matala le faitotoa, sa le'i faamauiina.

Na fetogia'i faataamilo solo e Monike lana fana ma faasino atu i le faitotoa. “Ia lapata'i se tasi a e te le'i faia le mea lona!” na ia musumusu atu ai.

“E leai se tasi e sau iinei,” na fai atu ai Konesetatino.

“E mata'utia tele. O lea e le manaomia ai ni ki. Na ona tapuni lelei lava e tutuli ese ai urosa ma luko.”

“Ma le taika o loo taavao,” na tomumu atu ai Monike.

Na tuu i lalo e Konesetatino lana ato, tatala, ma tuu mai i fafo le moli uila. Na tuu atu ia Monike, a o ia tautau lana fana i lona tau'au.

Na mauia atu Monike i le faitotoa o le ana autu, ma faasino atu lana moli uila. Na faula'i ai le anoano o ogalaau sa faaputu i le auala a o aga atu i le mauga. O se seti o faasinoala uamea na ui atu i le pogisa, ma faasolo atu i luma ua leiloa atu e le susulu o le moli. O tala mai, na taatia ai le pealua o taavale la'u koale o malolo i luga o faasinoala i autafa o le poloka.

A o i ai i le auala, na maitauina e Monike ni lala o ana faapogisa. Na ia masalomia le mauga o loo faatumulia i ogalaau ma ana. E leitioa tagata galulue i maina e fai ma tafafao mai i fafo i le pogisa o le po Setiga mo sina malama itiiti, e ui ina o loo i lalo o ataata o le vai oona.

Na fesili Monike mo se faasinomaga a o latou aga atu i fafo. “O fea la o le a o i ai?”

Na filemu Konesetatino.

Na faasaga atu i ai Monike ia te ia.

A e na ona faamimigi o le tama. “Ou te le iloa. Na pau le mea ou te iloa, o le aga'i i lalo.”

Na mapuea Monike. Ia, o le faasinoala le mea lona. O lana moli uila i lona lima, na ia laa ifo loa i lalo i le pogisa.

(e faia pea...)



Usufono Talavou Fono Tele 2025



Nisi o le Au Faafiafia Matagaluega Faleata, Aso Tupulaga Fono Tele



Tupulaga Faleata i Faafiafiaga Fono Tele 2025